

**Kementerian Pelajaran Terima Memorandum Daripada GBM  
Bernama  
5 April, 2012**

KUALA LUMPUR, 5 April (Bernama) -- Gabungan Bertindak Malaysia (GBM) mewakili 19 badan bukan kerajaan (NGO) berhubung perkembangan dan masa depan pendidikan teknikal dan vokasional hari ini menyerahkan satu memorandum kepada Kementerian Pelajaran.

Memorandum itu diserahkan oleh wakil gabungan tersebut, Tan Yew Sing dan diterima Timbalan Menteri Pelajaran, Datuk Dr Wee Ka Siong di lobi Parlimen, di sini.

Antara NGO terlibat ialah Dewan Perhimpunan China Kuala Lumpur dan Selangor (KLSCAH), Persatuan Perniagaan dan Perindustrian Cina Daerah Kuala Selangor dan Sabak Bernam (KS-SBCCC), Persekutuan Persatuan Alumni Sekolah Cina Malaysia (PPASCM) dan Pertubuhan Gerakan Belia Bersatu Malaysia (GBBM).

Antara kandungan memorandum itu ialah cadangan supaya diwujudkan Jawatankuasa Penasihat Pendidikan Teknikal dan Vokasional Negara yang berperanan menyelaras dan memantau proses penambahbaikan berkaitan sistem pendidikan itu.

Selain itu, gabungan itu juga bersedia untuk mengadakan perbincangan dan bekerjasama dengan semua badan kerajaan bagi menjayakan Program Tranformasi Ekonomi (ETP) melalui kemahiran yang lebih sistematik dan berkesan.

Sementara itu, ketika sidang media, Wee berkata pihaknya menerima baik cadangan dan saranan yang dikemukakan agar dapat menambahbaik sistem pendidikan teknikal dan vokasional di negara ini.

Beliau berkata, kerajaan kini sedang mentranformasi sistem pendidikan vokasional dan setakat ini sebanyak 15 sekolah menengah di seluruh negara dipilih sebagai perintis Program Asas Vokasional (PAV).

"Melalui program itu, pelajar akan didedahkan dengan bidang kemahiran yang juga asas vokasional pada usia lebih muda, seterusnya melayakkan mereka memperoleh Sijil Kemahiran Malaysia (SKM) tahap dua sebaik menamatkan Tingkatan Tiga kelak," katanya.

---

BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=657291>